

REGIONAL NEWS BULLETIN

Date – 12/07/2024 Time - 18:30 -18:40Hrs

HEADLINES (EVENING)

- Cheng vaibelchhe 32 chuang hu Methamphetamine, Khawzawl leh Champhai Police tangkawp ten Champhai atanga Aizawl pan lirthei atangin an man.
- Mizorama pangang vulha eizawngte tanpuina tur nizung chakna Solar Energy chu Silk Samagra 2 hnuaiah Baktawng Cluster hnuaiah tan a ni.
- India leh Bhutan chuan sik leh sa inthlak leh nungcha humhalh kawngah thawhdun an rel.
- Supreme Court chuan Delhi Chief Minister leh Aam Aadmi Party National Convener Arvind Kejriwal chu liquor policy scam-a sum chhehrelh thubuaiah ED in a mannaah interim bail a pe.

<><><>

DRUG SEIZED

Khawzawl leh Champhai Police tangkawp chuan vawiin khan Champhai atanga Aizawl pan lirthei atangin ruihhlo tam tham tak cheng vaibelchhe 32 chuang hu an man.

Ruihhlo man hi Metamphetamine niin motor neitu leh khalhtu ni bawh Lalrintluanga, Champhai Vengsang nia insawi chu man nghal a ni a, Khawzawl SP Pu Lalchhuanthanga sawi danin vawiina Methamphetamine an man hi Kg 115.55 a ni a, a vaiin Pack 106 niin Pack khatah hian mum 10100 zel a awm a, Methamphetamine an man zawng zawng hi mum nuai 1 sing 7 leh 600 a ni a, hei hi tualchhung Rate a chhutin cheng vbch 32 nuai11 sing 8 man hu a ni tiin SP chuan hetiang zat man chu Mizoramah tum khat a man tam ber ala nih an rin thu a sawi.

Champhai OC Pu Dhian Singh Minhas leh Khawzawl OC Pi T Lalnuntluangi te sawi danin Champhai Police te hian an thudawn bawh zuiin Khankawn ah an lo enfiah a, an endik lai hian phurh engmah a nei lova. Engmah phurh nei lo mahse an ngaih tha lo chuan Khawzawl Police te an pur a, Khawzawl Police te chuan Khawzawl Lungvar veng, JNV pengah a biru lai Bolero hi lo nangching in Methamphetamine hi an man ta a ni.

<><><>

CM

Chief Minister Pu Lalduhoma chu vawiin khan Mukesh Ambani-a fapa Anant Ambani leh Radhika Merchant te inneihna hmang turin Mumbai a pan.

Thudawn danin Chief Minister hi a tu te pathum nen an kal a, Ambani te VT VTI Learjet thlawhna an charter hmangin Lengpui a chhuahsan a, Chief Minister hian social media-a a tarlan danin July ni 5 khan Ambani fapa te inneihnaa tel ve tura sawmna hi a dawng a, vawiin vek hian OSD to Chief Minister, Delhi a cham mekin Mumbai lamah a zui ve dawn bawh a ni.

Inneihnaah hian India ram politician lian leh sumdawng lian te an tel tha hle tura ngaih a ni a. Ruahman anga thil a kal chuan Chief Minister Pu Lalduhoma te chhungkua hi Thawhtanniah an thlawhna kal na hian a rawn dah leh dawn a ni.



WORLD POPULATION DAY

World Population Day 2024 chu vawiin khan Champhaia General Nursing & Midwifery School ah hman a ni a, Dr. Zatluanga, Champhai District Medical Superintendent chuan he hun hi a hmanpui a ni.

Dr. Zatluanga chuan thusawiin, tun hma chuan Hriselna chungchangah inzirtir nasat a ngaih hle a ni a ti a, World Population Day pualin Synod in nau nei tam te hnenah lawmman a pe a, Ram changkangah mi an tam ve vak vak lova, khawpui a thawl nuam em em thin a ni a ti. Chhang zin lutuk te, chawm theih loh khawp fa neih te Mihring hrisel a, nau a piang a nih chuan natna nei lo leh hrisel taka a awm hi an tum ber a ni a ti bawk.

Ram changkangah chuan hriselna an ngaih pawimawh a, taksa sawizawi an uar hle a, Taksa hrisel tura taksa sawizawi uar a tul a, taksa hriselna kan ngaih pawimawh a tul hle a ni a ti. Kumina World Population Day, 2024 ah hian Nu leh nausen hriselna tura chhang khat mawi tawka naupai tih chu thupui atan hman a ni.

He hun hi Dr. PC Lalhmingliana, Sr. CMO chuan kaihruiin Pi C. Lalramengi, DPO chuan World Population Day hman a nih chhan leh a tum te a tarlang a, World Population Day tum bulpui ber chu Family planning a nih thu sawiin Family planning hian fa neih tlem ringawt a tum a ni lova, nu leh naute tana hrisel tawk tura chhang khat tawka nau neih chu a tum ber a nih thu a sawi a, nau chhang zing lutuk hian nu nau chungah thi leh nausen thihna a thlen thei a, nu leh naute tan harsatna tam tak a thlen thei, a ti.

He hunah hian Pi Lalhmingmawii Consultant hnen atangin Dengue chungchang a hriattur pawimawh hrang hrang ngaihthlak a ni bawk.



SERICULTURE

Mizorama pangang vulha eizawngte tanpuina tur nizung chakna Solar Energy chu Silk Samagra 2 hnuaiyah Baktawng Cluster hnuaiyah tan a ni.

SELCO Foundation leh Sericulture Department tangkawpin Pangang vulhtuten pangang an enkawlina kawnga an tangkai pui tur pangang vulhna ina nizung chakna hman tur chu vawiin khan Silk Samagra 2 hnuaiyah Baktawng Cluster-a Eri Rearing House ah bultan a ni a, he hmalakna hian Pangang vulh tu mi 14 te tanpuina pe in kum 2025 ral hma in Pangang vulhna in 1500 chuang pek chhuak an tum a ni.

Vawiina Solar Lighting inhlanchhawna hun Baktawnga hun hmanah hian Sericulture Department atangin Extension Officer Pi Remlalliani Zadeng leh Sericulture Demonstrator Baktawng bialtu V. Lalremruati ten an tel pui a, SELCO Foundation atangin Operation Manager PB Lalrinfela chuan telpuiin department leh kuthnathawktute nena an thawhhona chu lawmawm atih thu a sawi.

Baktawng bialtu Sericulture Demonstrator V. Lalremruati sawi danin Baktawngah hian pangang vulhtu mi 14 an awm mek a, vawiina nizung chakna hmanga tanpuina an dawn chuan pangang vulh kawngah hmasawna a thlen ngei a beisei thu a sawi.

Vawiina hun hmanah hian kuthnathawktu mi 14 te hnenah pangang vulhna ina Solar bun that hman dan turah zirtirna pek an ni a, pangpang vulh kawnga an hriat tur hrang hrang zirtir an ni bawk.



CENTRE FOR CONSUMER EDUCATION

Aizawl Centre for Consumer Education chuan nimin khan Aizawl khawpui hmuna dawr leh sumdawna lian awmna hmun te tlawhin an thil zawrh leh hralh dan an enfiah.

He hunah hian thil leitute dikna chanvo chu dawr neitute hnenah hrilhfiyah an ni a, sumdawng lian te chu Consumer Protection Act, 2019 dan in a ngen angin dik leh fel taka sumdawng turin an ngen a. Thil zawrh chu a man inziak aia toa hralh lo turin an ngen a, bungraw tha lo zawrh leh MRP aia toa hralh chu dan bawhchhiatna a nih thu leh na taka hrem theih an nih thu an sawi a ni.

Consumer hotute te hian chawhma lamah Vishal Mega Mart an tlawh a, heng bakah hian dawr lian leh sumdawna hmun hrang hrang an tlawh bawk a ni.



SYNOD BOOKROOM REDUCTION SALE

Synod Bookroom chuan kum danga an lo tih thin angin lehkhabu man tlawma zawrh runpui, Reduction sale chu tun thla ni 8 atanga ni 20 thlengin an buatsaih.

Reduction Sale-ah hian Synod Bookroom-a lehkhabu zawng zawng, Bible, Kristian Hlabu, Kohhran mamawh chi hrang hrang, Stationery item zawng zawng leh School Naupang mamawhte za zela 5% - 80% ti tlawmin hralh chhuah a ni dawn a, Mizoram chhunga Synod Bookroom Branch leh Distribution Centre zawng zawng leh Churachandpur-a Synod Bookroom-ah te Reduction Sale hi kalpui mek a ni.

Synod Bookroom Reduction Sale hi mipuiin lehkhabu tha leina hun remchangah hmangan an hlut hle thin a. Sorkar Office leh Kohhran leh mimal library neite pawhin a hlawma lehkhabu leina hunah an lo hmang tawh thin a. Reduction Sale hnukung ber nikum 2023 khan chawlhkar hnih chhungin cheng nuai 261 sing 7 sang 2, za 3 sawmsarih pathum hmuh a ni.

Tun tum Reduction Sale hi Synod Bookroom Branch 16 leh Distribution Centre 44-ah kalpui a ni a. Lehkhabu hrang hrang 7,500 chuangah a man pangngai aia tlawma hralh mek a ni.



CRIMINAL LAWS

Ramchunga dan thar 3 Criminal Law chu July ni 1 atangin hman tan ni mahse a tuk July ni 2 ah dan thar hmang lo turin Supreme Court ah Public Interest Litigation (PIL) thehluh a ni.

He thu hi Govt Mizoram Law College Asst Professor Pi Zoparliani'n Akashvani corr nen an inkawmna ah sawiin Supreme Court a PIL lut chu dan thar hi a tha tawklo an tih vanga lut ani a ti a, dan thar chu hman ngei tur ani tih sawi chian theih ala ni lo tih sawiin Case kal lai mek a ni a ti a, dan tharah chuan dan hluia mi zaa 80 ala awm tho a ni a ti.

Dan hluiah thuthar thehdarhtuten sawrkar duhloh zawnga an sawi avanga hrem theihna dan Section 124A awm thin chu a hma aia na zawkin hrem theiha siam

a ni a ti a, thuziah mai piah lamah zalenna tam tak lo awm thin chu dan hmangin hrem theih ani tawh dawn tih a sawi.

Advocate Emanuel Lalthazuala pawhin dan thar chungchang sawiin hmun hrang hrangah thlawp lo tu tam tak an awm a ti a, dan thara an sawiselna lian tak zingah Police ten misual an kawl theih hun chhung tih rei ani a ti a, mimal dikna chanvo a bawhchhia tia sawichhuak an tam tih a sawi bawk.

Advocate sawi danin Dan chuan mipuite dikna ngaihtuah chung a ro rel thin a ni a ti a, sawiselna tam tak karah sawrkarin a rawn chhawp chhuah avangin rorelna in kal danah rinna nghah ngam a pawimawh tih a ti a, Mipuiin ngaihven a pawimawh tih sawiin engkimah mahni himna tur dan ngaihven a pawimawh tih a sawi.

<><><>

INDIA- BHUTAN

India leh Bhutan chuan sik leh sa inthlak leh nungcha humhalh kawngah thawhdun an rel. Vawiin khan Bhutan Minister of Energy and Natural Resources, gem Tshering-a kaihhruai team te chu New Delhi ah Union Minister of State for Environment, Forest and Climate Change, Kirti Vardhan Singh te nen an inbia a. Sik leh Sa inthlakte, boruak tihthianghlim, ramngaw siam, nungcha humahla leh environment leh climate change lamahte capacity building lama thawhdun an rel a ni.

Pu Singh-a chuan International Big Cat Alliance-ah Bhutanese Minister a tel chu lawmawm atih thu sawiin ram pahnihten ram leilung inang an intawm thu leh mipui rorelna democracy ngaihlu ram an nih thu a sawi a. Ram pahnihte tan sik leh sa inthlak chu an buaina inang a ni a ti a. Pu Tshering-a pawhin Bhutan chu carbon-negative ram anih tawh thu leh a energy tam zawk chu hydropower a ni tawh a ti bawk.

<><><>

KHEJRIWAL BAILED

Supreme Court chuan Delhi Chief Minister leh Aam Aadmi Party National Convener Arvind Khejriwal chu liquor policy scam-a sum chhehrelh thubuaiah ED in a mannaah interim bail a pe.

Justice Sanjiv Khanna leh Dipankar Datta chuan he thubuai hi ngaihtuahin Enforcement Directorate ten an khinna chu bench lian zawkah a thawn a. Hetihlai hian Pu Khejriwal hi Tihar Jail ah a la awm mek a. CBI ten Liquor policy case ah hian Prevention of Corruption Act hnuaiah an man a ni.

ED te hian kumin March ni 21 khan Pu Khejriwal hi an man a. May ni 10 khan Supreme Court chuan Lok Sabha inthlan campaign turin bail a chhuah a phalsak a. Tun thla June ni 2 khan jail ah a lut leh a. AAP hruaitu hian Delhi High Court ah ED manna hi a khing hmasa phawt a. He hi April ni 9 khan hnawl sak a ni a. Hemi hnu hian Supreme COurt ah a khing leh a. Supreme Court chuan bail a phalsak ta a ni.

<><><>